



Inuit Ataqatigiit Inatsisartuni

Nuuk, 05.10. 2007

Inatsisartut Suleriaasianni § 36, imm. 1 naapertorlugu Naalakkersuisunut apeqquq imaattoq matumuuna saqqummiuppara:

Naalakkersuisunut apeqquq:

Ilinniagaqartut angajoqqaaminni najugaqanngitsut ilinniagaqarnersiutinik assigiimmik annertussuseqartumik tamarmik pisaleqqullugit ilinniagaqarnersiutit pillugit maleruagassanik allannguinnissamik Inatsisartut tamarmiullutik 2006-imi ukiukkut ataatsimiinnerminni aalajangersariigaat (UKIU 2006/88), Naalakkersuisut qanoq malitseqartinnialersaarpaat ?

Taassuma saniatigut Inatsisartut Suleriaasianni § 32, imm. 1-imi aammalu imm. 5-imi aalajangersarneqarsimasut Naalakkersuisunit malikkumaneqarnersut paasissutissiisutigineqassasoq kissaatigineqarpoq ?

(Inatsisartuni ilaasortaq Johan Lund Olsen, Inuit Ataqatigiit)

Inatsisartut 2006-imi ukiukkut ataatsimiinneranni oqaluuserisassani immikkoortoq UKIU 2006/88-mi, ilinniagaqartut angajoqqaaminni najugaqanngitsut ilinniagaqarnersiutinik assigiimmik annertussuseqartumik tamarmik pisaleqqullugit ilinniagaqarnersiutit pillugit maleruagassanik atuuttunik allanngueqqullugit Naalakkersuisut peqquneqassasut, Inatsisartut aalajangiiffigisassaattut siunnersuuteqarpunga.

Siunnersuut partiit tamarmiullutik taperserpaat.

Aappassaaneerinninnermi Naalakkersuisut akissuteqarnerminni nalunaarutigivaat 2007-imut Aningaasanut Inatsisissaq suliarineqalerpat siunnersuut ilaatinneqassasoq.

August 2007 Naalakkersuisut 2007-imut Aningaasanut Inatsisissatut siunnersuut saqqummer-sippaat tassanilu paasinarsivoq siunnersuut ilanngunneqarsimanngitsoq. Tamatuma kingorna Naalakkersuisut 19. september 2006 Aningaasaqarnermut Ataatsimiititaliamut akissuteqarlutik ilimasaaripput Inatsisartut siusinnerusukkut aalajangiutereersimasaat naapertorlugu 2007-imut Aningaasanut Inatsisissatut siunnersuummut allannguutissamik siunnersuuteqartoqassasoq.

Neriorsuisoqareersorli taamatut pisoqanngilaq, ilisimaneqartutummi 1. november 2006 Aningaasaqarnermut Ataatsimiititaliamut akissuteqaqqinermi Naalakkersuisut nalunaarutigivaat, Inatsisartut aalajangersimanagerat 2008-mut Aningaasanut Inatsisissap suliarineqarnissaanut atattillugu aatsaat Naalakkersuisut ilanngutissallugu naatsorsuutigigaat.

9. februar 2007 ullulikkanik Naalakkersuisunut allagaqarlunga suliap sumut killinneranik paasiniaavunga aammalu ilinniagaqartut angajoqqaaminni najugaqanngitsut najugaqartullu assigiinngitsumik atugassaqartinneqarnerisa taamaattariaqarnera pillugu aalajangiunneqareersoq qanoq malitseqartinnialersarneqarnerisooq apeqquqteqaatigalugu.

25. februar 2007 Inuussutissarsiornermut, Suliffeqarnermut Inuussutissarsiutinullu ilinniartitaanermut Naalakkersuisoq Siverth K. Heilmann akissuteqarluni imaattunik allappoq:

“Soorlu apeqquteqaatinnut tunngavilersuutinni eqqortumik allaaserigit angajoqqaaminni najugaqanngitsut qaffasinnerusumik ilinniagaqalerniarlutik ilinniartut aammalu qaffasinnerusumik ilinniagaqartut 2007-imut aningaasanut inatsisip naammassineqarnerani aaqiivigineqanngillat. Pissutsit pineqartut pitsanngorsaavigineqarnissaat, - soorlu aamma allakkit, partiinit tamanit 2006-imi ukiuunerani ataatsimiinnermi taperserneqareemat, ajornartorsiutip aaqiivigineqarnissaa 2008-mut aningaasanut inatsisip suliarineqarnerani Naalakkersuisut ataatsimut tulleriarineranni ilaatinneqassaaq.”

Ajunngikkaluassusia !

Naluneqanngitsutulli marlunngorneq 2. oktober 2007, 2008-mut Aningaasanut Inatsisissatut siunnersuut Inatsisartunit siullermeerneqarpoq. Pakatsinavissumik tamatumani keermiaasiit paasinarsivoq aalajangiunneqareersoq tamanna Naalakkersuisunit malitseqartinneqarsimanngitsooq. Taamaattumik ilinniagaqartut akornanni nangittumik assigiinngisitsisoqaaqinnissaa aarlerinartorujussuuvoq, naak nassuiarneqareersutut tamanna Inatsisartut 2006-imi erseqqilluinnartumik unitsinneqassasoq piumasarereeraluaraat. Naalakkersuisummi isumagisimanngilaat siunertamut 2008-mut aningaasaliissutissanik immikkoortitsisoqarnissaa.

Inatsisartut tamarmiullutik isumaqatigiissutigisaminnik 2006-mi aalajangersaareernerisa kingorna taamaammat isumaqarpunga Inuussutissarsiornermut, Suliffeqarnermut Inuussutissarsiutinullu ilinniartitaanermut Naalakkersuisup Inatsisartut Suleriaasianni § 32, imm. 1-imi kiisalu imm. 5-imi aalajangersarneqarsimasut malinniarlutik arlaleriarluni piumassuseqarfigisarsimanngikkai. Taamaallilluni Naalakkersuisut akisussaatinneqarsinnaanerit pillugu Inatsisartut inatsisaat unioqqutisimasinnaallugu Naalakkersuisoq pasillerneqarnissamat aarlerinartorsiorsorinarpoq. Tamanna pisinnaalissaaq Inatsisartut tamarmiusut isumaqatigiissutigeriigaat malitseqartinniarlugu iliuuseqarfiginiangikkuniuk piaartumillu 2008-mut Aningasanut Inatsisissaq akuersissutigineqartinnagu ilinniagaqartut angajoqqaaminni najugaqanngitsut najugaqartullu assigiinngitsumik atugassaqartinneqartarnerat unitsissallugu peqqussutigineqareersoq aamma iliuuseqarfiginiangikkuniuk.

§ 32, imm. 1 aamma imm. 5 Inatsisartut Suleriaasianniittoq imaattunik oqaasertaqarput, **qerner-tumik** allanneqartut malugeqquneqaramik:

“§ 32, imm. 1. Inatsisartuni ilaasortap, partiip Naalakkersuisulluunniit inatsisiliornissamik imaluunniit inatsimmik pioreersumik allangortitsinissamik atorunnaarsitsinissamilluunniit siunnersuutaat Inat-sisartuni aalajangiiffigisassatut siunnersuutigalugit saqqummiunneqartassapput. Siunnersuut tunngavilersugaassaaq, aalajangiiffigisassatut ilusilerlugu oqaasertaligaassalluni taaguusigaassallunilu.

Imm. 5. Imm. 1-imi taaneqartutut Inatsisartuni aalajangiiffigisassatut siunnersuut Inatsisartunit akuersissutigineqarpat **Inatsisartut inatsisissaattut** Inatsisartulluunniit peqqussutissaattut **siunnersuuterpiatut saqqummiunneqarnermigut** imaluunniit nalunaarutinngorlugu atortuulersinneqarnermigut **piaartumik atortuulersinnarnissaa Naalakkersuisut pisussaaffigissa-vaat.**”

Ilisimatitsissutigineqassaaq Inatsisartut Suleriaasiat Inatsisartut inatsisiliaattut imaluunniit Inatsisartut peqqussutillaattut naleqartigimmat.

Inuiaqatigiit aningaasartuutissaat naluneqanngitsutut inatsisitut ilusilerlugu sularineqartarpoq. 2008-mut Aningaasanut Inatsisissatut siunnersuutip sularineqarnerata nangeqqinnerani taamaammat piaartumik aalajangiiffigisassatut siunnersuutip UKIU 2006/88-p aamma Inatsisartut tamarmiusut tunuliaqusersoreersimasaat ilanngunneqassasoq naatsorsuutigaara.

Aalajangersagaq UKIU 2006/88 matumani ilanngunneqarpoq.

Johan Lund Olsen
Inuit Ataqtigiit